

АКАФИСТ СВЯТОМУ СЛАВНОМУ ПРОРОКУ, ПРЕДТЕЧЕ И КРЕСТИТЕЛЮ ГОСПОДНЮ ИОАННУ

Кондак 1

Избранный от лет древних быти Предтечею и Крестителем Спасителя мира Христа Бога, Иоанне богохвальне, прославляюще прославльшаго тя Господа, похвальная восписуем ти, яко большему всех рожденных женами, во плоти Ангелу, покаяния проповеднику; ты же, яко имеяй велие дерзновение ко Господу, от всяких бед свободдай и к покаянию воздвизай нас, любовию тебе зовущих:

Радуйся, великий Иоанне, Пророче, Предтече и Крестителю Господень.

Икос 1

Архангел Гавриил, предстояй пред Богом, послан бысть ко иерею Захарии, егда той, служа по чину чреды своея, вниде покадити в церковь Господню; и, представ одесную олтаря кадильнаго, благовествоваше о твоём рождестве, великий

Иоанне, возвещая Захарии радость и веселие, и яко мнози о рождестве твоём возрадуются. Сего ради и мы, дивному о тебе Божию благоволению чудящиеся и радующиеся, со благоговением в похвалу тебе вопием:

Радуйся, Совета Божия неизреченного таинниче; радуйся, дивного смотрения Его исполнение.

Радуйся, прежде лет многих пророчеством Исаии проявленный; радуйся, вестниче пред лицом Господним, древле прореченный.

Радуйся, предназначенный быти великим пророком Вышняго; радуйся, по обетованию Ангела рожденный.

Радуйся, еще во чреве матери твоея Духа Святаго исполненный; радуйся, прежде рождества твоего на великое служение освященный.

Радуйся, неплодства родителей разрешение; радуйся, иерея Божия радость и веселие.

Радуйся, дочери Аароновы прозябение; радуйся, плод молитвы Богодарованный.

Радуйся, великий Иоанне, Пророче, Предтече и
Крестителю Господень.

Кондак 2

Видя Захария явльшагося ему Ангела, смутися, и
страх нападе на нь, и не верова словесем
благовестия его о рождестве твоём; егда же за
неверие немотою связан бысть, удивляшеся
преславному чудеси, всем сердцем вопия Богу:
Аллилуиа.

Икос 2

Разум неуразумеваемый разумети ищуще людие,
ждуще Захарию, и чудяхуся, умедлившу ему в
церкви; изшедшу же ему и не могущу глаголати к
ним, но токмо помавающу, разумеша вси, яко
видение виде в церкви. Мы же, прославляюще
дивнаго Творца чудес, Бога, вопием тебе таковая:

Радуйся, благий виновниче безгласия отча; радуйся,
слез матери твоея пременение на радость.

Радуйся, тоя поношения в людех отъятие; радуйся,
великое рождшим тя утешение.

Радуйся, яко в шестый месяц о зачатии твоём Пресвятая Дева Мария в Назарете от Ангела известися; радуйся, яко о рождестве твоём мнози возвеселишася.

Радуйся, яко имя благодатное, от Ангела нареченное, получивый; радуйся, яко именем твоим немотствование отца твоего Захарии разрешися.

Радуйся, яко имя Божие о тебе отцем твоим благословися; радуйся, яко о чуднем рождестве твоём страх и удивление в окрест живущих явися.

Радуйся, яко по всей стране Иудейстей о дивнем рождестве твоём возвестися; радуйся, яко тобою спасение многим в мире сем явися.

Радуйся, великий Иоанне, Пророче, Предтече и Крестителю Господень.

Кондак 3

Сила Вышняго разреши неплодство заматоревшия во днех своих праведныя Елисаветы: зачат бо ты, славный Предтече Господень, и таяшеса месяц пять, глаголющи: яко тако мне сотвори Господь во дни, в

няже призре отъяти поношение мое в человецех.
Егда же прия Имущую во чреве Христа,
исполнися Духа Свята и возопи гласом велиим:
«Откуда мне сие, яко прииде Мати Господа моего ко
мне!» С Неюже радующийся, взываше Богу:
Аллилуиа.

Икос 3

Имемй предыти пред Господем духом и силою
Илииною, еще из чрева матере твоя исполнися
еси Духа Святаго, отонудуже и Пророк дивный
показался еси, егда во утробе матере твоя сый,
выгрался еси радощами пришествию Матери
Господней. Бога бо познал еси носима в ложеснах
Благодатныя и Того матерним гласом проповедал
еси: подобаше бо Божественных вещей преславным
быти началом. Сему убо благоговейно
удивляющесея, с радостию тебе вопием:

Радуйся, еще во утробе матерней предпославшаго тя
Господа чудным веселием предъявивый; радуйся,
яко тебе ради и матери твоей Елисавете воплощение
Христово открыся.

Радуйся, яко и та исполнися Духа Свята; радуйся,
яко и она предивная пророчица явися.

Радуйся, яко от нея Пресвятая Дева Мария
Блаженною в женах наречеса; радуйся, яко тою Она
и Материю Господа наименовася.

Радуйся, яко и безсеменный плод Тоя
Благословенным пронаречеса; радуйся,
Премудросте Божественныя предъявление.

Радуйся, святаго супружества благословение;
радуйся, неплодных ложесн дивное прозябение.

Радуйся, рождением твоим удививый люди;
радуйся, светлый Слова гласе. Радуйся, великий
Иоанне, Пророче, Предтече и Крестителю
Господень.

Кондак 4

Бурею сомнения смущенный, иерей Захария не
можаше, по словеси ангельскому, проглаголати.
Егда же по рождестве твоём, Предтече Господень,
написа благодатное имя твое, абие отверзошася
уста и язык его, и глаголаше, благословя Бога, и
пророчествова, глаголя: благословен Господь Бог

Израилев, яко посети и сотвори избавление людем Своим, и ты, отроча, Пророк Вышняго наречешися, поя Тому: Аллилуиа.

Икос 4

Слышаша окрест живущии людие о преславнем и чуднем рождестве твоем, со удивлением глаголаху в себе: «Что убо отроча сие будет?» Мы же тя, преславный Предтече Господень, яко больша всех рожденных женами, достойно чтуще, ублажаем сице:

Радуйся, от зачатия твоего благодатных явлений исполненный; радуйся, в рождестве твоем Богом прославленный.

Радуйся, во младенчестве твоем от отца твоего Пророком Вышняго нареченный; радуйся, во отрочестве твоем Духом Святым просвещенный и укрепленный.

Радуйся, Бога воплотившагося сродник по плоти бывый; радуйся, от Бога высокое звание Предтечи и Крестителя приемый.

Радуйся, заре, Свет новый миру возвестившая; радуйся, звездо, путь, ведущий ко Христу,

осветившая.

Радуйся, деннице Солнца незаходимаго; радуйся, светильнице Света неугасаемаго.

Радуйся, путь грядущему Христу уготовляяй; радуйся, Ангела и человека в себе являяй.

Радуйся, великий Иоанне, Пророче, Предтече и Крестителю Господень.

Кондак 5

Богопротивное веление беззаконнаго детоубийцы Ирода изгна тя из дому отча в непроходную пустыню, носима материю, Предтече Господень, идеже и пребывал еси до дне явления твоего ко Израилю, ядый акриды и мед дивий и Богу вопия: Аллилуиа.

Икос 5

Видяще дивное Божие о тебе промышление, Иоанне богохвальне, яко от младенческих пелен постническаго жития любитель показался еси, отонудуже волею Вышняго послан был еси проповедати людем грядущее во Христе спасение,

сего ради со удивлением и любовью тебе взываем:

Радуйся, яко, еще младенец сый, царя Ирода устрасил еси; радуйся, от напраснаго убиения тем десницею Вышняго сохраненный.

Радуйся, пустыни шипок благовонный; радуйся, высоту подвигов твоих всех удививый.

Радуйся, праваго пути верный указателю; радуйся, чистоты и целомудрия предивный хранителю.

Радуйся, евангельскаго самоотвержения образе совершенный; радуйся, монашествующих покрове и утверждение.

Радуйся, богословствующих умов просвещение; радуйся, грешным милосердия Божия двери отверзаяй.

Радуйся, кающимся грешником от Господа прощение подаваяй; радуйся, плоды достойны покаяния творити помогаяй.

Радуйся, великий Иоанне, Пророче, Предтече и Крестителю Господень.

Кондак 6

Проповедник славный ты, божественный Предтече, показался еси в пустыни Иорданстей во дни явления Христа Бога миру. Сего бо, Грядущаго к тебе, показал еси людем, глаголя: «Се, Агнец Божий, вземляй грехи мира!»; Егоже мы верою познавше, поем Ему: Аллилуиа.

Икос 6

Возсиял еси свет истины, Иоанне богопросвещенне, всем являяй Славы Отчия сияние, явльшееся плотски нас ради. Вопиял бо еси в пустыни людем:

«Покайтесь, приближи бо ся Царствие Небесное: сотворите плоды достойны покаяния. Се бо грядет по мне, Иже крестит вы водою и Духом». Сего ради похвальная тебе вопием:

Радуйся, пришествия Мессии возвестителю;
радуйся, путей Господних уготователю.

Радуйся, ветхия и новыя благодати ходатаю;
радуйся, пророков пределе и начало Апостолов.

Радуйся, гласе Слова благознаменитый; радуйся, покаяния проповедниче велегласный.

Радуйся, многих сынов Израилевых ко Господу обративый; радуйся, люди совершенны Господеви уготовавый.

Радуйся, фарисеев и саддукеев дерзновенно обличивый; радуйся, плоды достойны покаяния творити научивый.

Радуйся, просвещения духовного указателю; радуйся, ищущим предстательства твоего неусыпный заступниче.

Радуйся, великий Иоанне, Пророче, Предтече и Крестителю Господень.

Кондак 7

Хотящу от тебе крестится Господу Иисусу, Иоанне богоблаженне, глагола еси: «Аз требую Тобою крестится», обаче повинуюся, рекшу Тому: «Остави ныне», воздвигл еси десницу твою на главу Его и, крестив не требующаго очищения, вопиял еси: Аллилуиа.

Икос 7

Новую подая благодать креститися изволивый от тебе Господь, сподоби тя Духа пришествие видети и глас Отческий с Небесе, свидетельствующий Его Сыновство, слышати. Отонудуже в Триех Лицех Единому Богу поклонятися нас научил еси. Егоже бренными прославляюще устнами, в похвалу сия тебе приносим:

Радуйся, Троического Богоявления первый проповедниче; радуйся, в Триех Лицех Единого Бога истинный поклонниче.

Радуйся, Духа Святаго в виде голубине яснозрителю; радуйся, снисхождения Его от Отца на Сына свидетелю.

Радуйся, гласа с Небесе от Бога Отца слышателю; радуйся, явления любви Отчи к Сыну созерцателю.

Радуйся, Сына Божия избранный Крестителю; радуйся, воли Его святыя исполнителю.

Радуйся, славного служения спасению рода человеческого ревностный рачителю; радуйся, великаго Таинства Крещения первый совершителю.

Радуйся, Божественныя радости вестниче; радуйся, Новаго Завета первый учителю.

Радуйся, великий Иоанне, Пророче, Предтече и Крестителю Господень.

Кондак 8

Странное и неизреченное смирение воплотившагося Бога Слова видево, богоблаженне Крестителю, Божественную Свою главу приклонивша и рабское крещение приемша, ты и сам весь исполнился еси великаго смирения. Испроси убо боголюбезную добродетель сию и нам, одержимым гордостью, яко да от сердца смиренна вопием Ему: Аллилуиа.

Икос 8

Весь благодатных дарований исполненный, течение временныя жизни скончавая, Иоанне богознамените, всех поучал еси исполнением Закона и покаянием благоугождати Господеви. Сего ради благодарственное хваление тебе, великому учителю истины, воспеваем:

Радуйся, Закона и оправданий Господних насадителю; радуйся, Иродова беззакония

обличителю.

Радуйся, о исправлении того рачителю; радуйся, правды ради темничное заключение и узы претерпевый.

Радуйся, за истину во главу усеченный; радуйся, яко тело твое от учеников твоих честне погребесея.

Радуйся, яко Божиим смотрением глава твоя нетленна соблюдеся; радуйся, яко та на утешение, освящение и цельбы христианом дадеся.

Радуйся, яко и деснице твоей, крестившей Господа, вернии благочестне поклоняются; радуйся, яко от тебе многая чудеса теми доньше совершаются.

Радуйся, яко тобою вернии от страстей безчестия избавляются; радуйся, яко тобою грешнии к покаянию воздвизаются.

Радуйся, великий Иоанне, Пророче, Предтече и

Крестителю Господень

Кондак 9

Все естество ангельское удивися высоте служения твоего, и Церковь благоговейно прославляет тя, яко друга Христа Бога, предшедшаго пред Ним духом и силою Илииною. Ревнуя бо по истине, дерзновенно обличал еси фарисеев и беззаконнаго Ирода, от него же и мученическую кончину приял еси. Поклоняющися убо честней главе твоей, молимся ти: избави нас от страстей безчестия, да чистым сердцем и усты поем: Аллилуиа.

Икос 9

Витийство всякое земнородных не довлеет достойно восхвалити тя, Иоанне богохвальне: тебе бо уста Христовы похвалиша, высша пророков и больша всех рожденных женами тя наименоваша. Отонудуже достойную похвалу принести тебе недоумевающе, вопием ти сицевая:

Радуйся, Церкви Христовы великая славо; радуйся, Ангелов предивное чудо.

Радуйся, праотцев радость и прославление; радуйся, пророков высокая похвало.

Радуйся, Апостолов богосветлый венче; радуйся, святителей велелепая красото.

Радуйся, мучеников в новой благодати начало; радуйся, преподобных совершение.

Радуйся, праведных удобрение; радуйся, девственников и постников основание.

Радуйся, всех христиан великое утешение; радуйся, яко от всех христианских родов имя твое прославляется.

Радуйся, великий Иоанне, Пророче, Предтече и Крестителю Господень.

Кондак 10

Спасти мир пришедшаго во плоти Христа Бога благовестил еси и сущим во аде: якоже бо денница, предходящая солнцу, осветил еси во тьме и сени смертной сидящих. Отонудуже вскоре Господем изведен был еси со всеми от века праведными, поя Ему, яко Избавителю и Победителю смерти: Аллилуиа.

Икос 10

Стена и прибежище спасительное всем, молитвенно к тебе притекающим, божественный Иоанне: сего ради песнями похвальными ублажаем тя сице:

Радуйся, мощный заступниче наш и верный от бед хранителю; радуйся, злостраждущих от духов злобы скорый помощниче и избавителю.

Радуйся, неплодствующим благословение от Бога низпосылай; радуйся, притекающих к тебе с верою от треволнения страстей избавляяй.

Радуйся, во вражде сущих скоро умиротворяяй; радуйся, во всякой нужде и печали усердно притекающим к тебе скорую помощь подаваяй.

Радуйся, благодетельствующих от самообольщения и прелести изымаяй; радуйся, вручающим себе твоему ходатайству в час смертный помогай.

Радуйся, любящих тя от воздушных мытарств предстательством твоим свободяяй; радуйся, почитающих славную память твою вечныя жизни молитвами твоими сподобляяй.

Радуйся, нищих и вдовиц и сирот заступление;

радуйся, по Бозе и Богородице христианом
прибежище и упование.

Радуйся, великий Иоанне, Пророче, Предтече и
Крестителю Господень.

Кондак 11

Пение всякое не довлеет по достоянию доблестей
твоих восхвалити тя, Крестителю Господень; но мы,
любовию понуждени, дерзаем воспевати величия
твоя, еже милостивно приими от нас, первостоятелю
у Престола Пресвятыя Троицы, и моли свободитися
нам от всякия скверны греховныя, да чистым
сердцем и устнами поем Богу: Аллилуиа.

Икос 11

Светильника Света неприступнаго и всесветлых
благодатных дарований всего исполнена ты, Иоанне
богопросвещенне, ведуще, радостно приносим ти
таковая:

Радуйся, самовидче озарившаго ты свыше
Божественнаго Света; радуйся, светом добродетелей
твоих прославивый Бога.

Радуйся, Пресвятая Троицы велелепую славу явивый; радуйся, правый и дивный путь к Небеси показавый.

Радуйся, и сущим во аде Бога, являшагося во плоти, благовестителю; радуйся, душ праведных, от века в преисподней держимых, возвеселителю.

Радуйся, Владыки Христа Бога друже искренний; радуйся, явивый миру Свет истинный.

Радуйся, светозарное света евангельскаго сияние; радуйся, рода христианскаго прославление.

Радуйся, Совета Божия исполнение; радуйся, яко от восток солнца даже до запад хвально имя твое.

Радуйся, великий Иоанне, Пророче, Предтече и Крестителю Господень.

Кондак 12

Благодати тезоименитый, Крестителю Господень, и тою обогатився, победоносец преславный показался еси: победил бо еси враги и всякую злобу, и великое служение твое мученическим подвигом запечатлел

еси. Ныне же, предстоя Престолу Царя царствующих, моли Его даровати верным победы на враги и во всем благопоспешение, в добродетелех же благодатное укрепление, поющим Ему: Аллилуиа.

Икос 12

Поюще Бога, дивно в тебе прославльшагося, хвалим тя, богоблаженне Крестителю, яко искренняго друга Христова, прославляем великия подвиги твоя, ублажаем мученическую кончину твою и сицевая радостно вопием ти:

Радуйся, вселенский Апостоле и Новаго Завета первомучениче; радуйся, явлением Христа на земли открывшагося Царствия Небеснаго первый проповедниче.

Радуйся, языков Божественное призвание предвозвестивый; радуйся, безвестная и тайная премудрости Божия миру явивый.

Радуйся, божественными деянии плодоносен паче иных явивыйся; радуйся, яко светом дел твоих прославися Отец Небесный.

Радуйся, яко в памяти твоей Церковь Христову

веселиши неизречно; радуйся, яко ныне вечнаго наслаждаешия веселия изобильно.

Радуйся, божественными лучами Трисолнечнаго Света осияваемый; радуйся, яко со безплотными Трисвятую песнь Богу немолчно вопиеш.

Радуйся, яко ныне, зеркалом разрешшимся, несредственне зриши Святую Троицу.

Радуйся, великий Иоанне, Пророче, Предтече и Крестителю Господень.

Кондак 13

О великий и преславный Предтече и Крестителю Господень Иоанне, прими от нас ныне приносимое тебе моление и твоими богоприятными к Богу молитвами избави нас от всякаго зла, и вечныя изми муки, и наследниками Царствия Небеснаго соделай, да во веки поем Богу: Аллилуиа.

Этот кондак читается трижды, затем 1-й икос «Архангел Гавриил...» и 1-й кондак «Избранный от лет...».

Молитва

Крестителю Христов, проповедниче покаяния, кающагося не презри мене, но, совокупляясь с вои Небесными, молися ко Владыце за мене, недостойнаго, унылаго, немощнаго и печальнаго, во многия беды впадшаго, утружденнаго бурными помыслы ума моего. Аз бо есмь вертеп злых дел, отнюд не имеяй конца греховному обычаю: пригвожден бо есть ум мой земным вещем. Что сотворю, не вем, и к кому прибегну, да спасена будет душа моя, токмо к тебе, святой Иоанне, благодати тезоимените, яко ты пред Господем, по Богородице, вем больша быти рожденных всех: ты бо сподобился еси коснуться верху Царя Христа, вземлющаго грехи мира, Агнца Божия. Егоже моли за грешную мою душу, да поне отныне, в первыйнадесять час, понесу тяготу благую и прииму мзду с последними. Ей, Крестителю Христов, честный Предтече, крайний пророче, первый во благодати мучениче, постников и пустынников наставниче, чистоты учителю и ближний друже Христов, тя молю, к тебе прибегаю, не отрини мене от твоего заступления, но возстави мя, падшагося многими грехи: обнови душу мою покаянием, яко вторым крещением, понеже обоего

начальник еси: крещением омываяй грех, покаяние же проповедуяй во очищение кождо дел скверных: очисти убо мя, грехми оскверненнаго и понуди внити, аможе ничтоже скверно входит в Царствие Небесное. Аминь.

Тропарь на рождество Иоанна Крестителя, глас 4

Пророче и Предтече пришествия Христова, достойно восхвалити тя недоумеем мы, любовию чтущии тя: неплодство бо рождшия и отчее безгласие разрешися славным и честным твоим рождеством, и воплощение Сына Божия миру проповедуется.

Кондак на рождество Иоанна Крестителя, глас 3

Прежде неплоды днесь Христова Предтечу раждает, и той есть исполнение всякаго пророчества: Егоже бо пророцы проповедаша, на Сего во Иордане

руку положив, явися Божия Слова пророк,
проповедник, вкупе и Предтеча. Величание на
рождество Иоанна Крестителя

Величаем тя, Предтече Спасов Иоанне, и чтим еже
от неплодове преславное рождество твое.

Тропарь на усекновение главы Иоанна Крестителя,
глас 2

Память праведнаго с похвалами, тебе же довлеет
свидетельство Господне, Предтече: показал бо ся еси
воистинну и пророков честнейший, яко и в струях
крестити сподобился еси Проповеданнаго. Темже за
истину пострадав, радуяся благовестил еси и сущим
во аде Бога, явльшагося плотию, вземлющаго грех
мира и подающаго нам велию милость.

Кондак на усекновение главы Иоанна Крестителя,
глас 5

Предтечево славное усекновение смотрение бысть
некое Божественное: да и сущим во аде Спасово
проповестъ пришествие. Да рыдает убо Иродия,
беззаконное убийство испросивши: не закон бо
Божий, ни живой век возлюби, но притворный,

привременный.

Величание на усекновение главы Иоанна Крестителя.

Величаем тя, Крестителю Спасов Иоанне, и
почитаем вси честныя твоя главы усекновение.